

每週經課朗誦經文(巴克禮台語漢字)2013/12/29

共同經課 - 1

以賽亞書六十三章七節~九節

7 我欲照耶和華一切所賞賜咱的，講起耶和華的慈愛及耶和華的名聲，及伊向以色列家所施的大恩；就是照伊的憐憫及豐盛的慈愛賞賜in的。8 因為伊講：in真正是我的百姓，無行虛假的子兒；按呢，伊就做in的救主。9 佇in一切的苦難中，伊也同受苦難；閣伊面前的使者拯救in；伊用慈愛及憐憫救贖in；佇古早的日常常抱in，懷in。

共同經課 - 2

詩篇一百四十八篇

1 恁著謳啉耶和華！對天頂謳啉耶和華，佇高的所在謳啉伊！2 伊的眾使者啊，恁著謳啉伊！伊的眾天軍啊，恁著謳啉伊！3 日及月啊，恁著謳啉伊！發光的星辰啊，恁攏著謳啉伊！4 天頂的天及天以上的水啊，恁攏著謳啉伊！5 諸個攏著謳啉耶和華的名！因為伊一下命令就攏受創造。6 伊將諸個建立，到永永遠遠；伊有定例，袂會廢無。7 對地上著謳啉耶和華，就是大魚及一切的深淵，8 火及冰雹，雪及雲霧，趁伊的話的狂風，9 大山及一切的小山，結果子的樹及一切的柏香樹，10 野獸及一切的精牲，蟲 及飛鳥，11 世上的君王及萬民，貴族及世上一切的審判官，12 少年人及在室女，老人及囡仔，13 諸個攏著謳啉耶和華的名！因為只有伊的名受尊做高；伊的榮光搬(pôaⁿ)過天地。14 伊興起伊的百姓的角，互伊聖的百姓攏謳啉伊，就是以色列人，親近主彼個百姓，恁著謳啉耶和華！

共同經課 - 3

希伯來書二章十節~十八節

10 獨獨看見彼個略仔卡輪天使的耶穌；為著受死的艱苦，得著榮光尊貴做冕旒，通對上帝的恩，為著眾人受死。11 因為萬物所為著伊、萬物所對伊的，啲導多多子到佇榮光，就互救in的首領，對苦難來成完全，本是合宜。12 因為彼個互人成聖的及許個得著成聖的，攏對一個出。所以伊稱in做兄弟無掠做見誚，13 講：我欲報揚你的名佇我的兄弟，謳啉你佇會中；14 閣講：我欲倚靠伊；閣講：看啊，我及上帝所互我的子兒。15 今諸個子兒既然相同有血肉的體，伊本身亦平平有，欲用死來廢無有死的權勢的，就是魔鬼，16 亦欲互一生驚畏死到親像做奴才者，攏得著解放。17 因為伊無牽救天使，是牽救亞伯拉罕的後裔。18 所以，凡事伊著及兄弟相同，通佇上帝的事做憐憫忠信的祭司頭，因為百姓的罪獻挽回的祭。

共同經課 - 4

馬太福音二章十三節~二十三節

13 in倒去了，有主的天使佇約瑟眠夢中出現，講：「起來！導嬰仔及伊的老母走去埃及，住遐，到我給你講；因為希律欲尋嬰仔來滅伊。」14 伊就起來，透暝導嬰仔及伊的老母去埃及，15 住遐到希律死。是欲應驗主託先知所講的，講：「我曾召我的子出埃及。」16 彼時希律知互博士設去，就大受氣，差人將伯利恆及周圍所有的查甫囡仔，照伊對博士詳細查的時，凡若二歲以下的一盡剖。17 按呢應驗早託先知耶利米所講的，講：18 佇拉瑪聽見聲，啼哭閣大傷悲，拉結哭伊的子兒，毋願受安慰，因為in無去。19 希律已經死，主的天使佇埃及佇約瑟眠夢中出現講：20 「起來！導嬰仔及伊的老母去以色列地；因為許個愛害嬰仔的生命者已經死啦！」21 伊就起來，導嬰仔及伊的老母到以色列地；22 總是聽見亞基老續接伊的老父希律佇猶太做王，就毋敢去遐，既然佇眠夢中得著指點，就退去加利利的境內，23 到一個城，名拿撒勒，恁遐倚起。是欲應驗早託諸個先知所講的講，伊欲叫做拿撒勒人。